

Šef misije OSCE-a u Albaniji pokazao srednji prst demonstrantima



Šef misije OSCE-a u Albaniji, njemački ambasador Bernd Borchardt, izvinio se jer je u nedjelju uvečer pokazao srednji prst antivladinim demonstrantima u Tirani, objavili su albanski mediji.

Do incidenta je došlo kada je Borchardt pješice prolazio kroz četvrt Astir gdje stanovnici mjesecima protestuju protiv prinudnog rušenja njihovih kuća da bi se izveo jedan projekat javne infrastrukture za koji tvrde da je povezan s korupcijom.

Na video snimku, objavljenom na društvenim mrežama, vidi se kako šef misije OSCE-a pred demonstrantima dvaput podiže srednji prst pošto su mu uzvikivali na engleskom "Sram te bilo".

Vladajuća, Socijalistička partija Albanije, nije kritikovala Borchardta, dok je opozicija zahtjevala da on smjesta bude smijenjen, prenosi Beta.

On je u ponedjeljak popodne sa zvanične adrese Misije OSCE-a na Twitteru izrazio žaljenje zbog svog gesta: "Iskreno bih se izvinio onima koje sam jučer uvrijedio. Poštujem pravo Albanaca na mirne demonstracije". (vijesti.ba)

Date: 15-10-2019